

11 JUN 1999

Mahathir-Pertanian

SEKTOR PERTANIAN MESTI MENYOKONG EKONOMI

KUALA LUMPUR, 11 Jun (Bernama) -- Malaysia mesti mempertingkatkan kecemerlangannya dalam penyelidikan dan pembangunan (R&D) bagi komoditi-komoditi utama dan sumber-sumber asli, menurut mesej Perdana Menteri Datuk Seri Dr Mahathir Mohamad dalam kertas Dasar Pertanian Ketiga Negara.

Perdana Menteri berkata, pembangunan industri-industri baru daripada sumber-sumber asli negara akan membantu proses perindustrian negara.

Pada masa yang sama, beliau berkata usaha membangunkan produk-produk bernilai tinggi daripada komoditi pertanian serta sisa pertanian dan hasil sampingan akan meningkatkan lagi produktiviti Malaysia dan daya saing global.

Pasaran baru perlu dicari bagi produk-produk untuk memastikan sumbangan bermakna sektor itu kepada pendapatan eksport, katanya.

"Kertas Putih" pertanian itu yang menggariskan dasar-dasar sehingga tahun 2010, dilancarkan oleh Menteri Pertanian Datuk Amar Dr Sulaiman Daud pada Selasa lepas tetapi salinan terbitan kerajaan itu dikeluarkan untuk umum semalam.

Dr Mahathir berkata, meningkatkan pengeluaran produk-produk makanan utama akan menjamin bekalan makanan dan membolehkan rakyat Malaysia mendapatkan makanan berkualiti pada harga yang mampu.

Untuk mencapai kecemerlangan dalam pertanian, beliau berkata, pembangunan sumber manusia, seperti pengurus-pengurus ladang profesional diperlukan untuk membangunkan sektor pertanian secara besar-besaran.

Beliau berkata, penekanan akan diberikan dalam membangunkan kemahiran ini.

Perdana Menteri berkata, sektor pertanian telah membuat sumbangan besar kepada pertumbuhan dan pembangunan ekonomi Malaysia.

"Perlu dipastikan yang sumbangan sektor itu kepada ekonomi negara dan daya saing globalnya terus kukuh di masa depan," katanya.

Dasar Pertanian Ketiga Negara, dikenali sebagai NAP3 akan menangani kelemahan-kelemahan dalam kertas dasar pertama dan kedua, menurut kertas itu yang diterbitkan oleh Kementerian Pertanian.

Dr Mahathir berkata, kerajaan sentiasa menyediakan persekitaran positif kepada sektor swasta untuk pembangunan industri pertanian dan penyertaan sektor swasta secara berterusan adalah perlu.

Beliau berkata, sektor awam akan menampung perkhidmatan sokongan kepada usaha-usaha sektor swasta, petani dan nelayan untuk mencapai objektif perniagaan dan pendapatan mereka.

"Pada masa yang sama, kerajaan-kerajaan negeri juga perlu memainkan peranan masing-masing untuk menampung keperluan sektor swasta memandangkan tanah adalah di bawah bidangkuasa mereka," katanya.

-- BERNAMA

GM PR